

## Bwana Atakuja Upesi zaidi ya Wengi Wanavyotarajia,

*Na Mungu, je! hatawapatia haki wateule wake wanaomlilia mchana na usiku, naye ni mvumilivu kwao? Nawaambia atawapatia haki upesi. Luka 18:7, 8.*

**I**kiwa watu wangeona kwa macho ya kimbingu, wangeona makundi ya malaika wenye nguvu wakiwa wamewazunguka wale ambao wamelitunza neno la subira ya Kristo. Kwa huruma na upole, malaika watakuwa wameshuhudia fadhaa zao na wamesikia maombi yao. Watakuwa wanasubiri neno la Kamanda wao wawachomoe na kuwatoa katika hatari inayowakabili. Lakini itawapasa wasubiri kidogo zaidi. Itawapasa watu wa Mungu kukinywea kikombe na kubatizwa kwa ubatizo. Kuchelewa kule kule, pamoja na maumivu yake, ndiyo jibu zuri zaidi kuliko yote kwa maombi yao. Watakapojitahidi kusubiri, huku wakimtumainia Bwana atende kazi watajikuta wakitumia imani, tumaini na uvumilivu, ambavyo walitumiwa kidogo sana wakati wa uzoefu wao wa kidini. Lakini kwa manufaa ya wateule wakati wa taabu utafupishwa...

Japo kuwa amri ya jumla imeweka tarehe maalum ya kuwaua wanaotunza amri za Mungu, adui zao katika baadhi ya mazingira watatangulia amri hiyo na kabla ya wakati ulioamriwa, watajaribu kuwaua wanaotunza amri za Mungu. Lakini hakuna hata mmoja atakayeweza kupenya jeshi la malaika wenye nguvu kubwa waliomzunguka kila mtu wa Mungu mwaminifu. Baadhi wataashambuliwa katika kukimbia kwao wakitoka katika miji na vijiji; lakini panga zilizoinuliwa dhidi yao zitavunjika na kukosa nguvu na kuwa kama mabua. Wengine watalindwa na malaika katika mfano wa watu wa vita.

Katika zama zote, Mungu ametenda kazi kwa njia ya malaika kuwasaidia na kuwaokoa watu Wake. Hawa viumbe wa mbinguni wameshiriki katika masuala ya wanadamu. Wametokea katika mavazi yao yanayong'aa kama umeme wa radi; wamekuja kama watu waliovaa mavazi ya watu maskini. Malaika wametokea katika umbo la wanadamu kwa watu wa Mungu. Wamepumzika, kama watu waliochoka, mwaloni. Wamepokea ukarimu wa nyumba za wanadamu. Wamefanya kazi ya waongozaji kwa wasafiri waliochelewa kufika nyumbani. Kwa mikono yao, wamewasha mioto kwenye madhabahu. Wamefungua milango ya magereza na kuwaachilia huru watumishi wa Bwana. Wakiwa wamevikwa mavazi ya mbinguni, walikuja kuliondoa jiwe kwenye mlango wa kaburi la Yesu.

Wakiwa katika umbo la wanadamu, malaika daima wako katika mikutano ya wenye haki; na wanatembelea mikutano ya waovu, kama walivyokwenda Sodoma, kuandika kumbukumbu za matendo yao, kuamua ikiwa wamevuka mpaka wa uvumilivu wa Mungu. Bwana anapenda rehema; na kwa sababu ya watu wachache wanaomtumikia kwa moyo wa dhati, anazuia majanga na anaendeleza utangamano miongoni mwa makundi ya watu. Kidogo sana wenye dhambi dhidi ya Mungu hutambua kuwa wanawiwa kwa ajili ya maisha yao na waaminifu wachache ambao wanapenda kuwadhihaki na kuwatesa... (Pambano Kuu, uk. 519, 520).